



Réckbléck op d' Saison 2001/2002?



"what's another year?...."

- D'Rouh vun der Sommervakanz hat nëtt ganz lang ugehalen , well schons den 20te September 2001 haten d'Cheffen eng **éischt Réunioun** fir Iddien auszetauschen an d'Weichen fir déi nei Saison ze stellen.
- Dat neit Scoutsjoer 2001/2002 ass offiziell agelaut ginn mam **LGS Kongress** an dem **Cheffdag**, déi den 22ten an 23te September 2001 um Cents ofgehalen goufen. Eng Delegatioun vu 7 Cheffen aus alle Branchen war vun eisem Grupp derbei, fir gewuer ze ginn, waat de Verband eis ënnert dem neien Thema "**Funtasi**" fir déi nächst 2 Joer proposéiert.
- Eis Wëllefcher waren dëss Saison nëtt ze bremsen. Samsdegs den 29te September hun sie déi nei Saison och praktesch ugefangen mat der éischer Versammlung.
- Freides de 5ten Oktober 2001 haten d'Cheffen vun alle Branchen vun eisem Grupp sëch am Home Rendez-vous ginn, fir op dem **St.-Martinschefdag** de gemeinsame Programm fir déi nei Saison ze ficelléieren.

An du gung et richteg lass :

- Den 9ten Oktober 2001 hun mir den Explorer a Pionnéier Rendez-vous ginn, fir an enger **éischter Versammlung** e Réckbléck op déi aal, an en Ausbléck op déi nei Saison ze kréien.
- Sondes 14ten Oktober hun mir eis mat eisem Fändel an an Uniform un de Feierlechkeeten vun der "**Journée de Commémoration Nationale**" zu Duelem bedeelegt.
- Mëttwochs den 17ten Oktober hun sëch d'Cheffen mat de Pionnéier zu Welfréng getraff, fir bei enger Partie **Keelen** de Programm fir dëss Branche an der neier Saison ze besprieche an d'Montée ze plangen.
- Den Weekend vum 19ten bis 21ten Oktober 2001 hu mi eis bal iwerschloen. Vu Freides owens un waren 5 Pionnéier mam Carlo ënnerwee, fir de **Pios-Hierschthike** ze erliewen, deen nieft dem flotten Erliewen an der hierschtlechter Natur fir déi Leit de läschte Punkt um Wee fir d'Bronze-insigne vum "**mérite jeunesse benelux**" war. Vun Samsdeg mëttes un waren dun all Scouten beim oder am Home beschäftegt. Eis Partizipatioun um **JOTA** (Jamboree on the Air) , d'**Montée**'en vun de Wëllef bei d'Avex (Alex, Charel, Eric, Leroy, Magali, Maxime, Naïke, Pit an Tom ,°) a vun den Avex bei d'Pio'en (Chris, Dany, Egide an Thierry) waren mat Spiller an enger Veillée an der Yurte ze bewältegen. Do dernieft hun eis Hike-Leit am Bësch geschlof an eng Equipe huet sëch mam Tim geploot, fir en Unhänger voll Äppel sichen ze fueren.
- Dënschdegs den 23ten Oktober hun mir zu Fëlschdrëf beim Carlo **Viiz** gekeltert an an der Garage gegrillt.
- Samsdegs den 17ten November 2001 hun mir eise Patréiner a Viirbild den **hellege Märten** gefeiert. Mat enger Mass an engem flotten Szenespill zu Wellesteen an der Kiirch , an enger Rezeptioun mat Schnittercher , Foto'en , Filmer an engem gudden Patt Wein hu mir mat ville Frënn a Sympatisanten am Léekeller zu Wellesteen **Märtesdag** gefeiert. Hoffentlech hat keen duerno de " mal de Saint Martin"!
- Freides de 16ten November waren eng Delegatioun vun Cheffen vun eisem Grupp zu Miersch um **AVEX-Chefftreff**. (sinn déi sou engagéiert , oder nëmmen sou frouh mam Beaujolais nouveau?)°
- Samsdegs den 1ten Dezember 2001 hu mir mat vereente Kräften am Home **Adventskränz** gemacht. GottseiDank haten eis gudd Séilen vun der Amicale schons ganz vill viirgeschafft, soss wäeren mir sëcher nëtt zur Zeit mat alle Bestellungen färdeg ginn; A wien wëllt schon nach en Adventskranz fir Silvester?
- Mëttwochs de 5ten Dezember 2001 war fir eise Grupp e groussen Daag. 6 vun eise Pionnéier hate genuch Asatz bruecht a waren an de Siège vun der Generalbank invitéiert ginn. Do kruten dun **de Boris, d'Conny, de Fonni, de Mike d'Nathalia an de Sebbi** vum Grand-Duc Jean perséinlech hir Bronze-Auszechnung vum "**mérite jeunesse benelux**". Et ass bemierkenswert, datt eise Grupp 6 vu 7 LGS-

Scouten gestallt huet, déi dat Joer zur Auszeechnung koumen, a wann een gesinn hat, waat eis Pio'en gelescht haten, da war dëss Distinction ganz kloer verdéngt. Schued nëmmen, datt souvill anerer op halwem Wee stoe bloufen. Nujee, villeicht huelen sie an der neier Saison frësch Ulaaf.

- Den 18ten Dezember hun eis Pionnier **d'Krëppchen** an der Duelemer Kiirch mam Jang opgeriicht.
- Donnegdes den 20ten Dezember 2001 sinn mir mat grousser Bedeelegung op Diddeléng **d'Friddensliicht 2001** siche gefuer.
- Samsdegs virun Krëschttag krute mir eng traureg Nouvelle. Den Här Berchem, de Propriétaire vun de Pio'en hirem Hais'chen zu Wies war gestuerwen. Dobei stunge mir schons bereet, fir him 2 Deeg méi spéit d'Friddensliicht vu Betlehem schenken ze fueren. Sollt dat den Ufank vum Enn zu Wies sinn?
- Op **Helleg Owend** hun mir dunn nach eng Kéier Vollgas ginn. Moies si mir uechter eis Diefer gefuer, fir eeleren a kranke Mënschen eng Kärz mat der Friddensflaam vu Betlehem, e puer Kichelcher an e bëschen Opmierksamkeet ze schenken. Et ass ëmmer nees ergreifend ze erliwen, wéivill daat enger Reih vun deene Mënsche gëtt. E klengt Stéck Hoffnung, e Liichtstrahl op dësem gefillsgeluedenen Dag. Fir Mëtteg waren all Equippen nees am Home, wou d'Lis eis mat enger gudder Pasta Asciutta verwinnt huet. No enger klenger Veillée bei der Duelemer Krëppchen huet sëch dunn jidfereen mam Friddensliicht bei sëch heemgemacht fir do mat der Famill Krëschttag ze feieren, ënnert eis a mat villen anere Mënschen verbonnen durch d'Flaam vu Betlehem.
- D'Besënnechkeet huet awer nëmmen bis no Naijoerschdag gehalen. Vum 3ten bis den 6 Januar 2002 haten **d'Avex hire Wantercamp** bei -15 Grad (an zum Deel futisser Heizung) zu Dikkrech. Während 36 Stonnen Non-stop agespart an ënnert Kamera-iwerwaachung hun eis Scouten **Big-Brother** hautno erliewt.
- Den 22te Januar hu mir eis **Generalversammlung** ofgehalen. Eng stark Präsenz vun eise Gemengeresponsablen huet daitlech gemacht, datt sie sëch stark fir eis Jugendarbecht interesséieren.
- Muenchen Samsdegnomëtteg hu fleisseg Hänn zu Wies weidergewerkelt. Duerfir konnte mir iwert de Wanter e puermol, no enger Partie Badminton , **zu Wies** beim Uewen op eise Couchen leien fir bei engem gudde Maufel (Pizza, Ietsebuli..) ze schnëssen an eis wuelzefillen.
- Op Buergsamsdeg, de 16te Februar hate mir eis Rendez-vous zu Duelem beim Home ginn. **Faakelenbau'en** stung um Programm, fir se owens zu Fëlschdreff bei der JAC um Buergbrennen ze verkafen an sou e flotten Fakelzug bei d'Buerg ze erméiglechen. Ganz niewebe bei hun mir och nach d'Invitatiounen fir eisen Teater ënnert d'Leit bruecht
- Den 23ten an 24te Februar 2002 war et dann sou weit. Den dramaturgeschen Héischpunkt vum Joer, den **Teater vun den Duelemer Scouten** huet d'Opmierksamkeet vun der Kulturwelt op sëch gezun."Manna-Manna" vun de Wëllef, 2 Een-Akter (En ass gelueden, 13 um Dësch) a 6 flott Sketcher (Finanzen-Finanzen, d'Ligge-statue, Chaussures Théo, Op der Bréck , de Cric an den neie Schaaf) gespillt vun Avex a Pionnier haten e groussen Applaus, an eis Amicale huet eis Teatergäscht beschtens ëmsuergt.
- Dëschdegs nom Teater, hate mir e relaxe Programm. Mat allen Würden a Leid-träger vum Grupp hu mir, am Home den Erfolleg vum Teater an den **9te Gebuertsdag** vun eisem Grupp mat Gegrills, Buffet an Dessert ausgiebig gefeiert. Et war eng réusséiert Generalprouf fir den 10te Gebuertsdag.
- Den 8te März huet sëch d'ganz Prominenz vun eisem Grupp (Cheffen, Amicale an Kirmeshelfer(innen)) zu engem **gemeinsamen Iessen** getraff. Zur Halbzeit vun der Saison hun mir do de Schwonk getankt fir dat, waat virun eis louch.
- Op Halleffaaschten hun eis Pio'en sëch, als Iinten getarnt un der **Réimecher Kavalkade** bedeelegt.
- Den 19te März 2002 sinn mir mat enger neier Iddie un den Départ gangen. Ënnert dem Lis senger fachfraulecher Leedung léieren zënter dem Dag 10 Scouten **Gitar** spillen. All Ufank ass bekanntlëch schwéier, mais éischt Kostproben beweisen, datt eise Gitarstrupp um gudde Wee ass. Macht weider sou!!
- Donnegdes den 21te März huet eng grouss Delegatioun vu Gréng-uniforméierten ,duerch hir Präsenz beim **Laichendéngscht** fir dem Carlo sei Papp, hir Verbonnenheet zum Ausdrock bruecht. En hätzleche Merci!

- Vu Gréngendonnegdeg owends bis Karfreides owens waren och dëst Joer nees bei der Aktioun "**Getsemani**" 6 Avex an 2 Cheff ennerwee fir de Jesus a senger schwéierster Stonn ze begleeden. Eng Nuetswanderung, eng Veillée am Bësch, Schlofen an engem klengen Chalet an gemeinsam schwéier a gemeinnützlich, Kierperlech Arbecht am Bësch sinn ëmmer nees Erfahrungen, déi Gemeinschaft a Gebuergeheet (am Vertrauen op den Härgott) erliwwen loossen
- Traditionsgeméis waren op Ouschterméindeg eis Explorercheffen ennerwee, fir s'ech zu Eschduerf an Emgëgend fir de Summercamp kënneg ze maachen.
- Un der **Groussbotzaktioun** vun der Duelemer Gemeng Samsdegs de 6ten Abrëll 2002 hun eng ganz Aberzuel vu Scouten matgemacht. Fir eis Scouten ass den Naturschutz eben en Härzensuleies!
- De Summercamp koum ëmmer méi no. Mëttwochs de 17ten Abrëll hu s'ech d'Cheffen vun den Avexgruppen aus dem ganze Land um Naihaisgen afonnt fir genau an d'Bild gesat ze gin. Mir waren och dobei.
- Den 20ten Abrëll owends hu mir eis mat villen Jugendlechen aus der Géigend zur **Péls-virbereedungveillée** an der neier Schoul zu Fëschdrëff afonnt. Zesummen wollte mir do der Fro nogo'en : " Wattu äss en Hooompéitsch?" Nodeems dat geklärt war, a mir no Veillée, Wuertgottesdëngscht a Kuch " online-to-heaven" waren, hu mir op den Départ zum Pilgergang gewaart. Déi Réimecher an déi Duelemer Avex zu Fëlschdref an der Schoul; d'Pio'en zu Wies beim Hais'chen. Zesummen sinn mir dunn an aller Härgottsfrëih an d'Stadt gangen. Zu Hesper ass nach de Sebbi derbei komm. Am Rollstull konnte mir hien mathuelen op eisem Wee zur Tréischterin am Leed. Dem Sebbi seng Zerbruechlechkeet an d'Iwerzeegung mat der hien sein Scouts-Verspriechen op der Gantebeensmillen ofgeluecht huet, hun eisem Pilgergang an d'Oktav eng extra Dimensioun ginn.
- Dëschdegs de 7te Mee bis Freides den 10te Mee stungen ganz am Zeechen vun der **Scoutskirmes.**, Gudd Wieder, flott Iddien a vill Asatz bei alle Bedeelegten hun derfir gesuergt, datt eis Kees gestëmmt huet. Jhust eist Rieserad huet eis am Plang gelooss. Duerfir gouf dat dun als Schaukel recykléiert.
- Paischtsamsdes den 18te Mee 2002 waren eis Pio'en un der Reih. Zesummen mat Pio'en vun enger Reih aneren Gruppen sinn sie mam Bus op Kandersteg (CH) gefuer fir do bis de 24te Mee den "**natural born climber**" ze spillen. Honger hun sie nëtt musse leiden, den Eric Eifes hat genuch Kéis-rieder matgeholt. A verstoppt gin ass och keen, den Eric hat och un genuch Ënnen geduecht. Jhust *d'Eclipse du loup* an *d'Biergdölpessen* hu se nëtt gesinn.
- Samsdegs den 1te Juni hu mir, zesummen mat de Réimecher Scouten, mat enger grousser Konstruktions de Scoutismus am Kanton Réimech bei der "**joyeuse entrée**" vun der groussherzoglecher Koppel vertraueden. Deen Owend koum d'Nooricht, datt zu Wies eist Hais'chen wäert fir Enn des Joeres ofgerappt ginn, well do eng nei cité entsteht. Elo sinn mir op der Sich no enger Alternativ, déi eis nett souséier verluer geet.
- Vu Freides 14ten bis Sondes 16te Juni hun eis Avex d' Scoutswiss bevölkert. Op hirem **Technikeweekend** hun sie Mensch a Material op de Summercamp virbereed. Raiche Badgeseegen ass op sie niddergang.
- Sondes den 30te Juni sinn eis Wëllefcher op Suessem op de **Wiwelsrallye** gefuer. Eng läsch Bewährungsprouf virum groussen nationale Summercamp am Kiischpelt.
- Sondes den 14te Juli gong et dunn fir sie lass. Mamm Zuch sin sie op den **Immatempa** an d'Eislék gefuer. 7 Deeg voller Abenteuer, Zeitreesen an Amusement, an dat alles fir de Pit erëmzefannen.
- 3 Deeg duerno ass et och fir eis Avex lass gangen. Héich de Bockel voll Gepäck hun sie de Wee op Eschduerf ugetrueden. Den **Jambalaya 2002** huet do bal 800 Explorer a Cheffen an 2 Hénger (den Eddi an de Merci) zesummebruecht. Spiller, Atelier, Hike, e Besuchsdag, Veillé'en a Fubus-bännercher! Scoutshärs wat begiers de méi? Steve Du has Deng Saach gutt gemacht mir sinn déck houfrech op Dech
- Sondes den 4ten August sinn nach e puer Cheffen op **Saarburg** gefuer, fir eisen daitsche Frënn bei der Eröffnung vun hirem **Jubiläumscamp** (40 Joer) de Réck ze steipen.
- De 7ten August wollte mir mat engem **Grillowend** fir d'Pio'en d'Saison beschléissen. D'Lis hat eis invitéiert, a wéi mir dann sinn ware mir och all do. A well et och nach dem Sebbi sein 17te Gebuertsdag war hun mir dat gleich mat him zesummen gefeiert. Et huet eis am Hätz wéi gedoen ze gesinn, wéi schwach eise

Frënd war. Trotzdem huet hien matgefeiert a seng Kärzen nach selwer ausgeblösen. Wéi mir him äddi gesot hun, huet keen geduecht datt et schons fir ëmmer wier.

- Den 24ten August 2002 hat de Sebbi ausgelidden. De Schock war grouss. Lo war dat geschitt, wat jidferen gefart hat, a wat mir awer all léiwer verdrängt haten. Nach eng Kéier hun dun déi, déi nëtt an der Vakanz waren, d' Scoutshiem ungedoen. Mat schwéierem Härz hu ganz vill Scouten dem Sebbi seng Famill op hirem battere Wee begleet. Zesummen mam Fränz, den aus Italien erbeigeflunn gouf, hun mir eise Frënd de Sebbi dem Härgott senger Léift unvertraut. Hien wees a geseit elo, waat mir nëmmen gleewen an hoffe kënnen. "Ce n'est qu'un au revoir..."
- No dem traurege läschten Optrëtt koum d' Scoutshiem fir eng Reih Wochen an de Schaaf. D' Akteuren op der Duelemer Scoutsbühn wollten sèch erblosen. Bei dëss opgezielten Aktivitéiten gehéieren weider +- 90 Versammlungen mat eise Scouten (all 3 Branchen zesummen), 3 Grupperéit, an eng ganz Reih Präparatiounstreffen vun de Cheffen, 6 oder 7 Badmintonspilltreffs vun de Pio'en, an Schaffasätz un eiser Bud zu Wies. D' Vakanz war dach verdéngt oder ?